

Powšitkowne WOZJEWJENJA

njedźelu, 25. oktobra 2020

Přiležnosć k swjatej spowědži w Róžeńće

wutoru, 27. oktobra farar M.Anders, farar C. Hrjehor,
18.30 – 19.30 hodž. farar Š. Delan, farar dr. M. Kleiner

sobotu, 31. oktobra farar M.Anders, farar T. Dawidowski,
17.00 – 18.00 hodž. farar dr. B. Dittrich

Přeco sobotu je do Božej mše za lud a kraj, kotraž so we 8 hodž. zahaji, přiležnosć k swjatej spowědži.

Wo česćowanju swjateho Bosćana informuja nětko w Budyšinje

Wustajeńcu wo česćowanju swjateho Bosćana w Chróšćanskej wosadze móža sej zajimcy hač do njedzele, 8. nowembra, w Budyskej tachantskej cyrkwi wobhladać. Přístupna je wona za čas wotewrjenja simultaneje cyrkwy wot pónđzele do soboty wot 10 do 16 hodž. a njedźelu wot 12 do 16 hodž.

W Smochćicach jeničce z přizjewjenjom kemši

Koronoweje pandemije dla je wotnětka wopyt njedźelných Božich mšow w Smochćanskim kubłanišću swjateho Bena jeničce z přizjewjenjom móžny. Štóž chce tam njedźelu kemši hić, měł so stajnje hač do pjatka do toho pod telefonowym čisłom (03 59 35) 2 20 abo z mailku na info@bg-schmochtitz.de z podačom mjena, adresy a telefonoweho čisła přizjewić. Boža mša njedźelu je tam w 10.30 hodž.

Seminar k přihotej na mandželstwo

Seminar k přihotej na sakrament mandželstwa wotměje so pjatk a sobotu, 27. a 28. nowembra, w Smochćanskim kubłanišću swjateho Bena. Přizjewjenja přijimaja so hač do njedzele, 8. nowembra, jeničce online na internetowej stronje Dekanatneho dušepastyrstwa. Link k wotpowědnemu formularj a k dalším pokiwwam je pod www.posol.de podaty.

Kubłanski personal w Radworju trěbny

Katolski serbski džěćacy dom Alojs Andricki w Radworju pyta kubłarku abo kublarja za městno dotalnej kubłarki, kotraž poda so na wuměnk. Městno ma so 1. decembra wobsadzić. Štóž ma zajim abo prašenja, njech so na wjednicu Andreju Henichowu pod telefonowym čisłom (03 59 35) 2 07 17 abo z mailku andritzki.kinderhaus@t-online.de wobroći.

Swobodne džěłowe městno w starowni

Dom swjateje Ludmile w Chróšćicach poskića wot 1. januara 2021 džěłowe městno dohladowanja wobydlerjow. Městno ma so z 20 hodžinami wob tydžeń wobsadzić. Přizjewić smě so kóždy, kiž so rady ze staršimi ludžimi zaběra. Nadrobniše informacije poda wjednistwo domu pod telefonowym čisłom (03 57 96) 9 47 30.

Zapokazanje noweho Serbskeho superintendenta

Ze swjedženskej Božej službu w Hodžijskej cyrkwi swjateho Pětra a Pawoła budže na reformaciskim dnju, sobotu, 31. oktobra, w 14 hodž. nowy Serbski superintendent Krystof Rummel do swjeho zastojnstwa zapokazany. Tež katolscy wěriwi su na tutu Božu službu přeprošeni. Nastupajo wobdželenje měli so aktualne postajenja korony dla wobkedźbować.

Maćična akademija wotprajena

Dale trajaceje pandemije dla su přichodne přednoški Maćičneje akademije, kiž bychu so po zwučenym wašnju zašlych lět wot nowembra hač do měrca w Budyskim hosćencu „Wjelbik“ wotměli, wotprajene. Po normalizowanju wobstejnosćow maja so zarjadowanja nachwatać, zdžěli stawizniska sekcija Maćicy Serbskeje.

Dalši serbski žarowanski kruh

Žarowanskaj přewodzerjej Regina Krawcowa ze Smječek a Tomaš Pěčka ze Sernjan poskićataj znowa serbski žarowanski kruh. Prěnje zetkanje budže štwórtk, 5. nowembra, w 17.00 hodž. w Chróšćanskej putniskej hospodže. Zajimcy měli so pola hospicneje služby w Kamjencu pod telefonowym čisłom (0 35 78) 37 43 12 abo pola Reginy Krawcoweje pod čisłom (01 74) 7 01 94 87 přizjewić.

Onlinowa konferenca k scěham korony w cyrkwi

Na wuchodoněmskich cyrkwinskih wikach „die pastore!“ móža so wšitcy zajimcy online wobdželić. Dohromady přewjedu tři rozmołwne zarjadowanja, kotrež zaběraja so z tym, kak stej so towaršnosć powšitkownje a wosebje cyrkwinske žiwjenje pandemije dla změniłoj. W přenjeje rozmołwje wutoru, 27. oktobra, wot 18. do 19.30 hodž. pórdže wo prašenje, što korona w towaršnosći wuskutkuje. Wutoru, 24. nowembra, wěnuja so prašenju, što korona z dušepastyrstwom čini, a wutoru, 15. decembra, kotry wliw ma wona na Bože služby. Při tym pórdže mjez druhim wo pro a contra přenjesenja Božich službow w interneće. Link k onlinowej konferency je pod www.posol.de wozjewjeny. Zarjadowarjo su wjacore katolske gremije a institucije wuchodoněmskich biskopstwow.